



*Minggu, 28 Mei 2023*  
**Ogen: Esekiel 36:26-30**



*Kesah Dibata I Bas Pusuhku*



**B**atu e me sada benda mate si cukup piher, labo mesunah pecah. Perbahan piherna, adi batu ipikpikken ku batu banci reh perciken api. Batu enda biakna la miser adi la ipeser jelma entah angin si gegehen asangkan ia. Adi galang batu e sekalak jelma banci labo terpisersa. (bandingkan batu penutup kubur Jesus). Kinatana, batu labo saja lit i daerah pegunungan entah i tepi pantai, i tepi dalan entah i tengah juma. Kepeken batu e banci lit i bas kula manusia umpamana, batu bas empedu, batu bas ginjal, batu bas ate ras sidebanna.

I bas renungenta Nabi Esekiel ngataken maka pusuh bangsa Israel mekeng bagi batu. Mekeng e nuduhkan biak entah karakter bangsa Israel e me keras kepala, piher pusuhna, la nggit megiken ajar, kai si enggo ibahanna e akapna si pasna. Sedekah enda ia enggo nimbak Dibata, ipindona penampat man bangsa si deban lako naluken musuh-musuhna. La iingetna nari maka Dibata gegehen asangkan kerina bangsa si megegehna kal i doni enda. Tupung iserang bangsa Asyur, pindona penampat bangsa Mesir ras ipajuhna ka Dibata-dibata kalak Mesir. Tuhu-tuhu kal itundalkenna Dibata alu la megiken perkatan Nabi paksa si e. La lit manusia si ngasup mecahken batu si lit i bas pusuhna.

Ngidah si e Dibata erpadan, Ku agui pusuhndu si mekeng bagi batu, kubereken man bandu pusuh si nggit patuh. Kuasa Dibata ngenca ngasup mpelambarui pusuh manusia si mekeng. Banci isalihkenNa pusuh si mekeng jadi pusuh si patuh (bandingkan Saulus si ngayak-ngayak kalak Kristen jadi perberita si meriah) Carana, itamakan Dibata kesahNa si badia ku bas pusuhna. KesahNa e ergegeh naluken biakta si mekeng. Kesah e erdahin mabai kita natap kempak Pendahin Jesus i bas kegeluhenta. Labo terjeng pusuh ipelambaruina, taneh pe seh maka mehumur taneh e, tupung isuani erlipat ulihna, cukup guna nehi keperluan geluh. Bangsa e pe jadi bangsa si erdolat sabap ipelawes Tuhan kerina musuh-musuhna. Arah perbahanan Dibata e si gejam min maka Tuhan ngenca erkuasa mereken kemalemen ate man banta.